

NORMATIVA PARA DEPORTISTAS DE ALTO NIVEL DA UNIVERSIDADE DA CORUÑA (DANUDC)

Aprobada polo Consello de Goberno na súa sesión de 30/06/2021

EXPOSICIÓN DE MOTIVOS

Actualmente, a actividade física e deportiva converteuse nunha condición para o desenvolvemento integral da persoa, co obxectivo de fomentar, difundir e xestionar a práctica do deporte entre os membros da comunidade universitaria, xa que aglutina elementos como a formación de hábitos beneficiosos para a saúde, as relacións sociais e a ocupación do tempo de lecer.

Nunha concepción moderna da educación universitaria, o deporte debe figurar como un aspecto fundamental na formación do estudantado, así como do resto da comunidade universitaria.

A ordenación da práctica deportiva e o seu desenvolvemento, nas universidades en xeral e na Universidade da Coruña en particular, resulta de capital importancia, o que fai necesario arbitrar una serie de medidas de orde académica e axudas que faciliten a plena integración dos/as deportistas no mundo universitario, ao mesmo tempo que permitan garantir unha adecuada compatibilidade entre o éxito nos seus estudos e a súa traxectoria deportiva.

Con base no marco lexislativo descrito nesta normativa para deportistas de alto nivel, a Universidade da Coruña, ademais de fomentar a práctica deportiva saudable na comunidade universitaria a través da promoción de actividades deportivas nas instalacións universitarias, establece medidas para conciliar a vida académica e profesional coa práctica deportiva e recoñece os dereitos e deberes do/da deportista universitario/a.

O Consello de Goberno da Universidade da Coruña acordou aprobar esta normativa en que se recollen as medidas de promoción e apoio ao deporte universitario e se definen os obxectivos e as estratexias que cómpre seguir no dito ámbito, á vez que se regulan os recoñecementos de estudos e actividades e se fixan os criterios para conciliar as actividades académica e deportiva.

MARCO LEXISLATIVO

A Lei orgánica 6/2001, do 21 de decembro, de universidades no seu artigo 90, dentro do título XIV («Do deporte e a extensión universitaria»), establece: «a práctica deportiva na universidade é parte da formación do alumnado e considérase de interese xeral para todos os membros da comunidade universitaria» e «as universidades establecerán as medidas oportunas para favorecer a práctica deportiva dos membros da comunidade universitaria e, se é o caso, proporcionarán instrumentos para a compatibilidade efectiva desa práctica coa formación académica do estudantado».

En consonancia co dito precepto legal, o Real decreto 1791/2010, do 30 de decembro, polo que se aproba o Estatuto do/da estudante universitario/a concibe, nos seus artigos

Código Seguro De Verificación	0hbeqHK35SjZk3Nj147mKw==	Estado	Data e hora
Asinado Por	Cristina López Villar - Vicerr. de Igualdade, Cultura e Deporte	Asinado	22/07/2021 13:16:59
Observacións		Páxina	1/6
Url De Verificación	https://sede.udc.gal/services/validation/0hbeqHK35SjZk3Nj147mKw==		



61 e 62, a actividade física e deportiva como un compoñente da formación integral do estudiantado universitario e encoméndalles ás universidades diferentes actuacións para promover a actividade física e deportiva, caso do desenvolvemento de estruturas e programas para acoller a práctica deportiva do estudiantado, nas condicións máis apropiadas segundo os usos, para o que destinará os medios materiais e espazos suficientes.

Os citados artigos establecen que as universidades promoverán a compatibilidade da actividade académica e deportiva do estudiantado, e máis concretamente a do estudiantado que conte co recoñecemento da condición de deportista de alto nivel por parte do Consello Superior de Deportes, ou de deportistas de nivel cualificado ou similar por parte das comunidades autónomas. Ademais disto promoverán programas de actividade física e deportiva específicos para estudantes con discapacidade.

Así mesmo, no ámbito das normas reguladoras da actividade deportiva tamén se recollen referencias ás actuacións que as universidades deben desenvolver. Así, a Lei 10/1990, do 15 de outubro, do deporte, nos seus artigos 6 e 53, establece previsións relativas á incorporación ao sistema educativo de deportistas que teñan a consideración de alto nivel e como desenvolvemento das ditas previsións, o Real decreto 971/2007, do 13 de xullo, de deportistas de alto nivel e alto rendemento alude expresamente no seu artigo 9 á obriga das universidades a tomaren en consideración esta condición de deportistas en procesos tales como cambios de grupos de docencia, de horarios ou de exames, para os efectos de lles permitir conciliar as súas aprendizaxes coas súas responsabilidades e actividades deportivas, ou en aspectos como os requisitos de permanencia.

Na mesma liña das normas estatais, a lexislación da Comunidade Autónoma de Galicia, a través da Lei 3/2012, do 2 de abril, do deporte de Galicia, no seu artigo 36, recolle os beneficios dos/as deportistas de alto nivel de Galicia e outórgalles a posibilidade de accederen á concesión de bolsas académicas e axudas económicas, así como a compatibilización dos seus estudos e a súa actividade deportiva.

No ámbito normativo propio da Universidade da Coruña tamén se recolle a importancia da actividade deportiva. Así, nos seus Estatutos, aprobados polo Decreto 101/2004, do 13 de maio e modificados polo Decreto 194/2007, do 11 de outubro, sinalase como finalidade da extensión universitaria, no seu artigo 59, «contribuír ao progreso e á difusión da actividade científica, técnica, cultural e deportiva no ámbito da comunidade universitaria e da sociedade», e no artigo 66 k), o dereito do estudiantado a «obter o recoñecemento académico pola súa participación en actividades universitarias culturais, deportivas, de representación estudantil, solidarias e de cooperación».

No Decreto 165/2020, do 17 de setembro, polo que se regula o deporte de alto nivel, de alto rendemento e de rendemento deportivo de base de Galicia establécese a regulamentación deste tipo de deporte, así como dos centros de alto nivel deportivo, da comisión galega de avaliación de alto rendemento deportivo e de rendemento deportivo de base e a oficina de atención ao deportista.

Con base neste Decreto 165/2020, elabórase a ORDE, do 23 de xuño de 2021, pola que se establecen os criterios técnico-deportivos para a obtención das condicións de persoa deportista de alto nivel, alto rendemento deportivo e rendemento deportivo de base, e os criterios deportivos para o recoñecemento dos núcleos de adestramento deportivo especializado.

Código Seguro De Verificación	0hbeqHK35SjZk3Nj147mKw==	Estado	Data e hora
Asinado Por	Cristina López Villar - Vicerr. de Igualdade, Cultura e Deporte	Asinado	22/07/2021 13:16:59
Observacións		Páxina	2/6
Url De Verificación	https://sede.udc.gal/services/validation/0hbeqHK35SjZk3Nj147mKw==		



A Universidade baseándose no Decreto 165/2020, do 17 de setembro, publica unha instrución da Vicerreitoría de Planificación Académica e Innovación Docente sobre as medidas que se adoptarán na docencia e avaliación dos/das deportistas de alto nivel e de alto rendemento deportivo, adestradores/as, técnicos/as, xuíces/as e árbitros/as de alto nivel deportivo, que formalizaran a matrícula na Universidade da Coruña.

En consecuencia, o Consello de Goberno da Universidade da Coruña, na súa sesión do día 30/06/2021, acorda aprobar a Normativa para deportistas de Alto Nivel da Universidade da Coruña (DANUDC).

1. OBXECTO

Esta normativa ten por obxecto definir o concepto de deportista DANUDC, establecer as súas diferentes categorías, determinar os seus deberes e dereitos, e concretar as medidas de promoción e apoio desta universidade ao deporte universitario e aos/as deportistas universitarios/as, en consonancia cos obxectivos que, respecto diso, recolle o Plan estratéxico da Universidade da Coruña (RS1.3).

2. DEPORTISTAS DE ALTO NIVEL DA UNIVERSIDADE DA CORUÑA (DANUDC)

Ten a consideración de deportista universitario todo o estudantado matriculado no curso académico en vigor, en estudos conducentes a unha titulación universitaria oficial da Universidade da Coruña, así como o resto de membros da comunidade universitaria (PAS, PDI e PDC) da UDC que representen esta universidade, ou a España, nalguna competición oficial a nivel autonómico, nacional ou internacional, tanto a título individual como colectivo.

Poderá obter a consideración de deportista universitario/a de alto nivel todo/a deportista universitario/a que cumpra algún dos seguintes requisitos durante o período académico do curso en que efectúe a solicitude ou durante o curso académico inmediato anterior a este:

- Ter o recoñecemento de deportista de alto nivel de conformidade co procedemento establecido polas normas reguladoras de carácter estatal (Real decreto 971/2007, do 13 de xullo, sobre deportistas de alto nivel e alto rendemento).
- Formar parte da selección nacional dalgunha das diferentes federacións deportivas estatais.
- Formar parte do Programa da asociación de deportes olímpicos (ADO) ou do Programa de apoio ao deporte obxectivo paralímpico (ADOP).
- Ter a condición de deportista de alto nivel pola Xunta de Galicia (Decreto 165/2020, do 17 de setembro, polo que se regula o deporte de alto nivel, de alto rendemento e de rendemento deportivo de base de Galicia) e que figuren recollidos no *Diario Oficial de Galicia*.
- Ser seleccionado/a pola Área de Deportes da Universidade da Coruña para representar esta nos campionatos de España universitarios (CEU), nos campionatos europeos universitarios (EUC) ou nos campionatos mundiais universitarios (WUC), na edición do curso académico inmediato anterior ao de referencia e obter unha

Código Seguro De Verificación	0hbeqHK35SjZk3Nj147mKw==		
Asinado Por	Cristina López Villar - Vicerr. de Igualdade, Cultura e Deporte	Estado	Asinado
Observacións		Páxina	3/6
Url De Verificación	https://sede.udc.gal/services/validation/0hbeqHK35SjZk3Nj147mKw==		



clasificación entre os tres primeiros lugares. No caso dos deportes de equipo, recibirán tal consideración todas as persoas integrantes do equipo.

Para outros niveis deportivos non recollidos con anterioridade, a Comisión de Valoración dos DANUDC poderá considerar outras circunstancias que serán debidamente motivadas.

A condición de DANUDC terá unha validez dun (1) curso académico, renovable no caso de manter os requisitos mínimos esixidos.

Tipos de niveis de deportistas de Alto Nivel:

- DANUDC Categoría I

Terá a consideración de **deportista alto nivel UDC categoría I** todo/a deportista universitario/a que cumpra con algún dos seguintes requisitos:

- Ter o recoñecemento de deportista de alto nivel segundo o Real decreto 971/2007, do 13 de xullo, sobre deportistas de alto nivel e alto rendemento.
- Formar parte da selección nacional ou autonómica de diferentes federacións deportivas.
- Formar parte do Programa de Deportes Olímpicos (ADO) ou do Programa de Apoio ao Deporte Obxectivo Paralímpico (ADOP).
- Ter a condición de deportista de alto nivel pola Xunta de Galicia segundo o Decreto 6/2004, do 8 de xaneiro, polo que se regula a cualificación dos deportistas galegos de alto nivel e os programas de beneficios dirixidos a estes e que figuren recollidos no *Diario Oficial de Galicia*.

- DANUDC Categoría II

Terá a consideración de **deportista de alto nivel UDC categoría II** todo/a deportista que cumpra os seguintes requisitos:

- Formar parte da selección universitaria da UDC nos últimos campionatos nacionais ou internacionais oficiais convocados.
- Ser medallista en competicións oficiais do Comité Español de Deporte Universitario durante o curso académico anterior.
- Clasificarse entre os 8 primeiros postos na fase final das citadas competicións, no caso de modalidades de deportes de equipo, durante o curso académico anterior.

- DANUDC Categoría III

Terá a consideración de **deportista de alto nivel UDC categoría III** quen acredite un excelente rendemento, tanto en competicións nacionais como internacionais de máxima categoría, dentro das modalidades deportivas que son de interese para a promoción do deporte na Universidade da Coruña.

3. DEREITOS E MEDIDAS DE APOIO A DANUDC

Establécense como dereitos dos/das DANUDC os seguintes:

Código Seguro De Verificación	0hbeqHK35SjZk3Nj147mKw==	Estado	Data e hora
Asinado Por	Cristina López Villar - Vicerr. de Igualdade, Cultura e Deporte	Asinado	22/07/2021 13:16:59
Observacións		Páxina	4/6
Url De Verificación	https://sede.udc.gal/services/validation/0hbeqHK35SjZk3Nj147mKw==		



- a. Inclusión no programa de titorización da ADI (Axuda á Diversidade da Universidade da Coruña, dependente da Vicerreitoría de Planificación Académica e Innovación Docente, VPAID) en que os/as titores/as asesorarán os/as deportistas e realizará labores de intermediación entre o estudantado e o seu profesorado para facilitar a conciliación das actividades académicas e deportivas daquel (asesoramento de trámites administrativos, adaptacións académicas, seguimento e avaliación e mediación nas solicitudes de cambios de horarios, exames e prácticas obrigatorias).
- b. Recoñecemento de créditos de participación (ECTS) nas ensinanzas de grao por actividades. A cantidade e as condicións para o recoñecemento efectivo dos ECTS estableceranse mediante unha resolución reitoral, de acordo coa normativa vixente na UDC.
- c. Acceso ao programa específico de bolsas e axudas que a Universidade da Coruña convoque para deportistas universitarios/as de alto nivel.
- d. Abono Deporte gratuito para o curso en que teña recoñecida a condición de DANUDC.
- e. Acceso gratuito ás instalacións deportivas da Universidade da Coruña en igualdade de condicións que o resto de persoas abonadas á Área de Deportes.
- f. Asesoramento e servizos complementarios relacionados co alto rendemento deportivo en colaboración con servizos, centros e facultades da Universidade da Coruña.
- g. Acceso á convocatoria de bolsas de exención de taxas de matrícula.
- h. Reserva, como mínimo, dun 3% das prazas nas residencias universitarias.
- i. Reserva, como mínimo, dun 2% das axudas propias da UDC para o transporte e o comedor.
- j. A reserva dun 3% na preinscrición e matrícula nos másteres universitarios para o curso académico en vigor. As bolsas e axudas serán incompatibles no caso de que compartan o mesmo obxecto da bolsa ou axuda.

4. DEBERES DOS DANUDC

Establécense como deberes dos/das DANUDC os seguintes:

1. Participar nas sesións de titorías que se concreten co/a titor/a académico/a que asigne o centro.
2. Presentarlle o calendario deportivo a quen titorice en que figuren as datas e os horarios dos adestramentos, competicións ou convocatorias. No caso de non as poder presentar con exactitude, achegaralle un calendario provisional co compromiso de o actualizar o máis axiña posible. En calquera caso, a dita presentación será entregada cunha anterioridade dun (1) mes ás datas dos exames oficiais ou das prácticas obrigatorias.
3. Concretar, con quen titorice, as posibles incompatibilidades entre a actividade académica e a práctica deportiva.
4. Xustificar as ausencias nas sesións académicas (tanto teóricas como prácticas) pola participación en adestramentos, convocatorias e/ou competicións. Será necesario presentar una certificación asinada polo club ou federación correspondente.

Código Seguro De Verificación	0hbeqHK35SjZk3Nj147mKw==	Estado	Data e hora
Asinado Por	Cristina López Villar - Vicerr. de Igualdade, Cultura e Deporte	Asinado	22/07/2021 13:16:59
Observacións		Páxina	5/6
Url De Verificación	https://sede.udc.gal/services/validation/0hbeqHK35SjZk3Nj147mKw==		



5. Colaborar coa Universidade da Coruña na promoción de programas e proxectos de actividade física, exercicio e saúde e hábitos de vida saudable.
6. Mostrar un comportamento acorde co Código Ético Deportivo e co Regulamento de participación en competicións, nas relacións coa organización, árbitros/as e outros/as deportistas que formen parte da organización naquelas competicións ou actividades en que participen.
7. Cumprir as normas establecidas polos regulamentos de réxime interno da Área de Deportes da UDC, tanto no uso das súas instalacións como no das competicións deportivas internas e externas en que participen, así como naquelas outras en que o fagan representando a Universidade da Coruña.
8. Cumprir as normas de disciplina deportiva elaboradas polos estamentos oficiais organizadores das competicións en que participen en representación da Universidade da Coruña.
9. Participar nas convocatorias do Campionato de Galicia Universitario, Campionato de España Universitario, Campionato de Europa Universitario e Campionato do Mundo Universitario e Universiadas, correspondentes á disciplina deportiva para a que foron considerados/as deportistas universitarios/as de alto nivel en representación da Universidade da Coruña.
10. Informar á Área de Deportes dos resultados que obteñan en competicións oficiais durante o período de validez de consideración de DANUDC.
11. Garantir que toda a información e os datos facilitados en referencia a resultados deportivos, marcas e convocatorias están certificados polo club e/ou federación deportiva correspondente.

No caso de non cumprir con algunha das anteriores condicións (agás por motivos debidamente xustificadas), perderase a condición de DANUDC.

5. OBTENCION DA CONDICIÓN DANUDC

Unha vez presentada a solicitude e logo de que a comisión pertinente lle recoñeza a condición, o/a deportista deberá aceptar e asinar o documento de compromiso de recoñecemento de DANUDC.

6. DISPOSICIÓN FINAL

Esta Normativa para deportistas de alto nivel da Universidade da Coruña (DANUDC) entrará en vigor o día seguinte da súa publicación no Taboleiro Oficial da UDC.

Código Seguro De Verificación	0hbeqHK35SjZk3Nj147mKw==	Estado	Data e hora
Asinado Por	Cristina López Villar - Vicerr. de Igualdade, Cultura e Deporte	Asinado	22/07/2021 13:16:59
Observacións		Páxina	6/6
Url De Verificación	https://sede.udc.gal/services/validation/0hbeqHK35SjZk3Nj147mKw==		

